

賓上林遷江四縣改歸賓州管轄在案今查武宣順流直達潯州水路一百里計程一日可到武宣之距賓州陸路山險不可行走水路更逆高灘須六七日方到一遇緊急公務往往稽遲臣爲地方因地制宜起見仰懇

聖恩將武宣一縣請歸潯郡管轄庶公務不致稽遲而地方亦大有裨益矣

藤峽善後議

翁萬達

一曰編保甲以處新民夫苗獠之亂萌於怙險若

非別里分疆剗其故宇終爲負固宜令江北一帶西自碧灘東連林崗皆南渡蓼水墾作便田江南一帶東起蒲竹西達河源亦托處平原遠背山麓但此等新民方就繩檢如放豚憚於胥絡野鹿駭於牢籠故假借過寬則獷戾之性仍在約束太驟則簡野之俗弗堪按之故牘曾有准入狼家或附編民戶者意非不美也但入狼則土蠻蠶食編民則廂里漁侵皆非善政宜倣古人保甲法度十家爲甲甲有總五甲爲保保有長各就族類擇耆